

**Unammilleqatigiinneq pillugu Inatsisartut inatsisaata
aamma nalunaarasuartaatitigut atassuteqarneq
nalunaarasuartaatitigullu kiffartuussinerit pillugit
Inatsisartut peqqussutaata allanngortinneqarnerinik
Inatsisartut inatsisaat
(Suliassa qarfinni aalajangersimasuni
unammilleqatigiinnermik aqutsineq,
attaveqaqatigiissutit elektroniskiusut nunanillu
tamalaanik suleqateqarneq)**

§ 1

Unammilleqatigiinneq pillugu (unammilleqatigiinnermut inatsit) Inatsisartut inatsisaanni nr. 1, ulloq 15. maj 2014 -imeersumi imaattunik allannguuteqartitsisoqassaaq:

1. § 23-ip kingorna ikkunneqassaaq:

”Kapitali 5a

*Suliaqarfiit aalajangersimasut siunnerfigalugit elektroniskiusunik attaveqaqatigiinnermut aamma
kiffartuussinnermut atatillugu unammilleqatigiinnermik aqutsineq
Internetimut appakaaffissaqartitsineq aamma peqatigiilluni ataatsimut atuisitsisinnaatitsineq pillugit ataatsimut
aalajangersakkat*

§ 23 a. Attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut peqatigiillutik ataatsimut atuisitsisinnaatitsineq pillugu akunnerminni isumaqatigiissusiornissaq pisussaaffigaat attaveqaqatigiissutit elektroniskiusut kikkunnut tamanut neqeroorutigineqarsinnaanissaat siunertaralugu, taamaalilluni kiffartuussissutit taamaattut Kalallit Nunaanni tamarmi neqeroorutiginnaaqullugit aamma unammilleqatigiit neqeroorutigisaat suleqatigiissinnaaqullugit.

Imm. 2. Atuisartoqarnermut Unammilleqatigiinnermullu Aqutsisoqarfik pisussaaffiliisinnaavoq, tamanna pisariaqaraangat, atuisut attaveqaqatigiissutini ataasiakkaani atassuserneqarnissaannik qularnaarukkumallugit imaluunniit attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik neqerooruteqartartunut, atuisup ataatsip amerlanerusulluunniit iserfigineqarsinnaanerannik paarsisuusunut, ilanngullugu unammilleqatigiit ataqatigiissaarutaasa

ataatsimut suleqatigiissinnaalersinnissaat, unammilleqatigiit neqeroorutigisaasa suleqatigiissinneqarnissaat qularnaarumallugit.

§ 23 b. Internetimut appakaaffissaqartitsineq aamma peqatigiilluni ataatsimut atuisitsinnaatitsineq isumaqatigiissutit imminut akilersinnaasunik atugassarititaasut iluanni aalajangersarneqartassapput.

Imm. 2. Naak imm. 1 atuukkaluartoq attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut, § 23 a, imm. 2 imaluunniit § 23 i naapertorlugit pisussaaffilerneqarsimasut, attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut allat internetimut appakaaffissaqartitsinermik aamma peqatigiilluni ataatsimut atuisitsinnaatitsinermik neqerooruteqassapput naammassisassat piumasallu neqerooruteqartumut pisussaaffigineqarsimasunut naapertuuttunik.

§ 23 c. Attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik neqerooruteqartartut internetimut appakaaffissaqartitsineq imaluunniit ataatsimut ingerlaarneq pillugit isumaqatigiinniarnert sioqqullugit, ingerlanneranni kingornaluunniit attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik neqerooruteqartartut allat paasissutissanik tigusaqartut taamaallaat paasissutissat pissarsiarisani siunertaasumut tunniunneqarnerat naapertorlugu atorsinnaavai, aammalu sukkulluunniit paasissutissat taakkua tigusimasani isertuuttussaallugit.

Imm. 2. Paasissutissat tigusimasat allanut ingerlatseqqinneqassanngillat, taamaaliornikkut unammilleqatigiinnermi iluaqutissarsinnaasumut, tamatumani aamma immikkoortortanut allanut, ingerlatseqatigiiffinnut allequtaasunut imaluunniit piginneqatigisanut.

Internetimut appakaaffissaqartitsinermi teknikkikkut aqutsineq

§ 23 d. Naalakkersuisut Atuisartoqarnermut Unammilleqatigiinnermullu Aqutsisoqarfimmit oqaaseqaatinik piniareernerme kingornatigut ersarinnerusunik malittarisassiorsinnaavoq, attaveqaasersuisartut niuerfimmi annerpaamik tiggummisuusut, internetimut appakaaffissaqartitsinissamik pisussaaffiligaasut, takuuk § 23 j, aamma attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut internetimut appakaaffissamik taamaattumik atuisuusut, ingerlatsinermut atatillugu teknikkikkulluunniit piumasaqaatinik naammassinittassapput, tamanna pisariaqaraangat attaviit ingerlanneqarnerisa nalinginnaasuunissaasa qularnaarneqarnissaannut.

Unammillernerme atugassarititaasunik misissuisarnerit

§ 23 e. Atuisartoqarnermut Unammilleqatigiinnermullu Aqutsisoqarfiup akuttoqatigiissaakkamik nalunaarasuartaateqarnerme unammilleqatigiinnerme pissutsit misissuiffigisarpai (niuerfimmi misissuineq), pisariaqartitsineq nalilersorsinnaajumallugu, § 23 i-lu naapertorlugu pisussaaffiliinissamut pisariaqartitsineq nalilersorsinnaajumallugu.

Imm. 2. Atuisartoqarnermut Unammilleqatigiinnermullu Aqutsisoqarfiup niuerfimmi misissuinerusimasut nutarsartarpai, niuerfusuni pissutsinilu atuuttuni pisariaqarneranik nalileereernerme.

Imm. 3. Neqerooruteqartartut niuerfimmi annerpaamik tiggummisuusut pisussaaffiligaasullu, takuuk § 23 i, aaqqissuusaaanikkut allanguinerit pisussaaffiliunneqarsimasunut annertuumik pingaaruteqartut pillugit Atuisartoqarnermut Unammilleqatigiinnermullu Aqutsisoqarfik ilisimatittassavaat.

Niuerfusunik killilersuisarneq

§ 23 f. Niuerfusunik misissuisarnernut atatillugu, takuuk § 23 e, Atuisartoqarnermut Unammilleqatigiinnermullu Aqutsisoqarfiup niuerfusut killissaat nalunaarsortassavai, nunarsuarmit akornanni periaatsit pitsaanerpaat tunngavigalugit, Kalaallit Nunaanni pissutsinut naleqqussarlugit.

Niuerfinnik misissuineq

§ 23 g. Niuerfinnik misissuisarnernut atatillugu, takuuk § 23 e, Atuisartoqarnermut Unammilleqatigiinnermullu Aqutsisoqarfiup niuerfinnik nalilersuineq ingerlattarpaa, § 23 f-imut naapertuuttumik killiligaasoq, nalilersorsinnaajumallugu niuerfinni taakkunani piviusumik unammilleqatigiittoqarnersoq.

Neqerooruteqartartumik niuerfimmi annerpaamik tigummisumik toqqaaneq

§ 23 h. Niuerfimmi misissuinerup, takuuk § 23 g, ersersippagu piviusumik niuerfusumi unammilleqatigiittoqanngitsoq, taava Atuisartoqarnermut Unammilleqatigiinnermullu Aqutsisoqarfiup niuerfimmi pineqartumi annerpaamik tigumminnittumik attaveqatigiissutinik imaluunniit kiffartuussissutinik elektroniskiusunik ataqatigiissaakkanik neqerooruteqartartoq ataaseq amerlanerusulluunniit toqqassavaa imaluunniit toqqassavai.

Imm. 2. Niuerfimmi ingerlatsisuusooq annertuumik ingerlatsivimmi tigumminnittuusutut isigineqassaaq, imm. 1 naapertorlugu, neqerooruteqartartoq annertuumik tigumminnittoq kisimiilluni imaluunniit neqerooruteqartartut allat peqatigalugit, aningaasaqarnikkut ima nukittutigisumik inissisimaguni unammillertit allat kiffartuussallu apeqqutaatinngit iliuuseqarsinnaassuseqarluni.

Imm. 3. Niuerfimmi aalajangersimasumi neqerooruteqartartoq imaluunniit niuerfimmi neqerooruteqartartut annerpaamik tigumminnittutut toqqarneqarpat, takuuk imm. 1, Atuisartoqarnermut Unammilleqatigiinnermullu Aqutsisoqarfik tamatuma ilutigisaanik neqerooruteqartartoq taanna niuerfimmi assingusumi annerpaamik neqerooruteqartartussatut toqqarsinnaavaa, niuerfimmi ataatsimi inissisimaneq niuerfiup aappaanut nuunneqarsinnaara niuerfusut taakkua marluk imminnut attaveqarnerisa periarfissaqartippagu, taamalu neqerooruteqartartup taassuma niuerfinni inissisimanera annertusaqqissinnaallugu nukittorsaqqillugulu.

Imm. 4. Niuerfimmi misissuinerup, takuuk § 23 g, ersersippagu niuerfimmi pineqartumi piviusumik unammilleqatigiittoqartoq, imaluunniit neqerooruteqartartoq niuerfimmi annerpaamik tigumminnittuujunnaarsimappat, taava Atuisartoqarnermut Unammilleqatigiinnermullu Aqutsisoqarfiup pisussaaffit tamaasa atorunnaarsissavai, immikkoortoq una naapertorlugu, imaluunniit immikkoortoq una naapertorlugu malittarisassiaasut naapertorlugit niuerfimmi annerpaamik tigumminnittuusimasumut pisussaaffiliunneqarsimasut, niuerfimmi pineqartumi annerpaamik tigumminnittuusimaneranni pisussaaffiliussaasut aqunniarlugit.

Neqerooruteqartartut niuerfimmi annerpaamik tigummisusut malittarisaliunneqarneranni pisussaaffit

Niuerfimmi aalajangiinerit

§ 23 i. Aalajangiinerni § 23 h, imm. 1 naapertorlugu, Atuisartoqarnermut Unammilleqatigiinnermullu Aqutsisoqarfik neqerooruteqartartut niuernermik annerpaamik tigumminnittuusut, takuuk § 23 h,

ataatsimik arlaqartunilluunniit pisussaaffiliissaaq.

Imm. 2. Atuisartoqarnermut Unammilleqatigiinnermullu Aqutsisoqarfiup aalajangikkani ataasiakkaani pisussaaffiliunneqartuni annertussusiusussanik aamma taakkua imarisassaannik aalajangersaasassaaq. Pisussaaffinnut imm. 1-imi pineqartunut ilaasinnaapput:

- 1) Internetimut appakaaffissaqartitsineq, takuuk § 23 j.
- 2) Assigiinngisitsinnginnissaaq, takuuk § 23 k.
- 3) Akimut ersittuutitsinissaaq, takuuk § 23 l.
- 4) Naatsorsuutit immikkoortukkuutaartumik aaqqissuussaanissaat, takuuk § 23 m.
- 5) Akinik nakkutilliineq, takuuk § 23 n.
- 6) Aaqqissuussamik immikkoortitseqqanissaaq, takuuk § 23 o.

Imm. 3. Atuisartoqarnermut Unammilleqatigiinnermullu Aqutsisoqarfik pisuni immikkut ittuni niuerfimmik annerpaamik tigungminnittunut allanik pisussaaffiliisinnaavoq, imm. 2-mi allattukkat saniatigut.

Imm. 4. Imm. 3 apeqqutaatinngu Atuisartoqarnermut Unammilleqatigiinnermullu Aqutsisoqarfik neqerooruteqartartut niuerfimmi annerpaamik tigungminnittut ingerlatsiviisa annikitsut malittarisaliuunneranni pisussaaffinnik allanik atugassiissuteqarsinnaavoq, pisussaaffiit imm. 2-mi eqqaaneqartut unammilleqatigiinnermi ajornartorsiummik § 23 g naapertorlugu paasineqartumik aaqqiinissamut naleqqutinngitsutut nalilerpagu.

Imm. 5. Aalajangiinnermi imm. 1, 3 imaluunniit 4-mi pineqartumut atatillugu Atuisartoqarnermut Unammilleqatigiinnermullu Aqutsisoqarfiup aalajangissavaa attaveqaqatigiissutinik imaluunniit kiffartuussissutinik elektroniskiusunik ataqatigiissaakkanik neqerooruteqartartut tamatumunga kalluarneqartut qanoq ilisimatinneqassanersut. Neqerooruteqartartut taakkua piffissaagallartillugu piffissaqarluartumik tamanna pillugu ilisimatinneqartassapput.

Internetimut appakaaffissaqartitsinermik pisussaaffeqarneq

§ 23 j. Internetimut appakaaffissaqartitsinermik pisussaaffeqarneq ima paasineqassaaq neqerooruteqartartut niuerfimmi annerpaamik tigungminnitsuusut internetimut appakaaffissaqartitsinermik piviusumik imaluunniit piviusuusaartumik neqerooruteqartartup internetimi immikkoortuinut, kiffartuussinerinut assigisaannillu ingerlataanut neqerooruteqartassasut. Tassunga atatillugu neqerooruteqartartoq Atuisartoqarnermut Unammilleqatigiinnermullu Aqutsisoqarfimmit internetimut appakaaffissaqartitsinissaaq taamaattulluunniit pillugit isumaqatigiissutit allannguuteqartinnissaannik noqqaassutit naleqquttut akuerinissaannut pisussaaffilerneqarsinnaavoq. Pisussaaffik ilaatigut makkuninnga imaqaarsinnaavoq:

- 1) Internetimi immikkoortunut ingerlatanullu, ilanngullugit internetimi immikkoortunut atunngitsunut, atuisartuutit attaviinut pisussaaffilersugaanngitsumik pisinnaaneq aamma atuisartuutit attaviinik tuniniaaqqissinnaanermik neqerooruteqarsinnaanermik pisinnaatitsineq.
- 2) Attaveqaqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut atuisinnaanermut qinnuteqartut pimoorussillutik isumaqatiginninniaqatigisassagaat.
- 3) Atortorissaarutinut siusinnerusukkat attaviliivigineqarsimasunut attavinnik atortitsiinnarnissanut.
- 4) Kiffartuussinernik assigiinngitsunik annertuukkaartumik pingajuusunut neqerooruteqartarneq niuerutigeqqitassatut.

5) Teknikkikkut saqqumisup ilusaanut, protokollinut imaluunniit teknikkikkut atortorissaarutinit allanut killeqanngitsumik attaveqarnissanut neqerooruteqartarneq, kiffartuussissutaasut imaluunniit kiffartuussissutaasunut assingusut unammilleqatigiit neqeroorutigisaat suleqatigiissinnaanissaannut pingaaruteqartunut.

6) Ataatsimut ineqarnissamik neqerooruteqarneq, ataatsimut ineqarnertut aqqissuussisinaanermik imaluunniit allatigut ataatsimut atortorissaarutinit atueqatigiinnissamik neqerooruteqarnerit, tamatumani aamma illuutinit ataatsimoorussilluni atuinissamik, illunut aqputinit ataatsimut atuinissamik, illuni kabelinik, napparutinit, antenninik, napasulianik, allanillu iluaqusersuutinit, kabelit ledningillu aqputaannik kabelinullu itersalianik aamma skavinnik atueqatigiinnissamik neqerooruteqartarnerit.

7) Kiffartuussinernik aalajangersimasunik neqerooruteqartarnissaq, atuisartut akornanni internetip attaviullu suleqatigiissinnaanissaasa qularnaarnissaannut pisariaqartunik, tamatumani aamma internetikkut kiffartuussissutit silatuut imaluunniit mobile netikkut atuisuuffigisap isumaqatigiissuteqarfigisimasaasa attaveqaataasa aqputaannik atuinernik.

8) Ingerlatsinernut ikorfartuutaasunik aqqissuussinernik software-nilluunniit assigisaannik atuinissamut neqerooruteqartassalluni, unammilleqatigiinnernik piviusumik ingerlatsinissamut pisariaqartunik.

9) Attaveqaatit assigiinngitsut imaluunniit internetikkut ingerlatsiviit tigussaasunik isumaliortaatsikkulluunniit naleqquttunik ataatsimut kattunneqarnissaannik neqerooruteqassalluni.

10) Kiffartuussinernik attuumassuteqartunik atuisinnaanermut neqerooruteqassalluni, soorlu kinaassutsimut, nunap immikkoortuani sumiinnermik peqataanermillu takutitsisinnaasunut.

Imm. 2. Internetimut appakaaffissaqartitsinermut pisussaaffinnik aalajangersaasarnerni Atuisartoqarnermut Unammilleqatigiinnermullu Aqutsisoqarfiup ingammik isiginiassavai;

1) niuerfimmi ineriartornerup ingerlasup teknikkikkut aningaasarsiornikkullu ingerlatsiviit imminnut unammillertut atornissai imaluunniit ikkunissai ajornartinnginneraa, internetimut appakaaffissaqartitsinermik aamma ataatsimut ingerlaarnermut aaqqiissutit qanoq ittuunerat qajassuullugu,

2) internetimut appakaaffissaqartitsineq neqeroorutigineqartoq tigussaasumik periarfissaqarnerisigut tigussinnaassuseq pigineqartoq eqqarsaatigalugu,

3) ingerlatsivimmik piginnittup pilersitsinissamut aningaasaliissutinit qanoq annertutigisunik aallarniuteqartariaqarnerisigut, pisortat aningaasaliissutigisimasaannut aamma nalorninaatinut tamatumunnga atasunut sanilliullugu,

4) ungasinnerusoq eqqarsaatigalugu killilersugaanngitsumik unammilleqatigiinnerup qularnaarneqarnissaanut pisariaqartitsineq, ingammik nunap iluani atortorissaarutit aningaasarsiornikkut akilersinnaasumik unammilleqatigiinnernik tunngaveqartoq, aamma

5) pisinnaatitaaffusinnaasut naleqquttut silatuumillu aqqissuussat nunarsuarmiullu kiffartuussinertigut neqeroorutaat.

Assigiinngisitsinnginnissamut pisussaaffik

§ 23 k. Assigiinngisitsinnginnissamut pisussaaffittut paasineqassaaq neqeroorutinit annerpaanik tigummisuusut qularnaassagaat pisussaaffit, pissutsit assigisaanni attaveqaqatigiissutinit imaluunniit kiffartuussisutinit elektroniskiusunik ataqatigiissaakkanik neqerooruteqartartut allat neqeroorutaasartut assigisaannik niueruteqartut, atugassarititaasut assigisaasa iluanni aamma akit assigisaasa iluanni, aammalu kiffartuussinernik neqerooruteqartassasut atugassarititaasut assigisaasa

iluanni, akit pitsaassutillu assigisaannik, kiffartuussinertut neqerooruteqartartumit allamit atortinneqartutulli, taassuma ataaniittutut ingerlatseqatigiiffutaanut imaluunniit suleqataanut aamma.

Imm. 2. Imm. 1-imi pisussaaffimmut aamma ilaapput pisut, kiffartuussinernik niuerfimmi annerpaamik tigummisuusup, imminut neqeroorutigisaani, ingerlatseqatigiiffimmut allequtaasutut pigisaminut suleqatigisaminulluunniit neqeroorutigisaani, nioqqutinit assigiinngitsunit katitigaasuni, aamma pisuni kiffartuussinernit assingusut neqeroorutigineqarfignisaanni pineqartunut atatillugu, imaluunniit nioqqutini assigiinngitsuni immikkuualuttortasutut ilaaffignisaanni.

Imm. 3. Neqerooruteqartartoq annerpaamik tigummisuusoq akimut ersittuutitsinissamik pisussaaffilerneqarsimasuni, neqerooruteqartartoq pisussaaffigiligaalluni nioqqutissanik nutaanik, pioreersunillu allannguumaarnissanik tamanut paasissutissiissuteqartarnissamik, takuuk § 23 1, taava Atuisartoqarnermut Unammilleqatigiinnermullu Aqutsisoqarfik niuernermut tunngatillugu aalajangiinnermini piumasaqarsinnaavoq nioqqut ataatsimoortoq nutaaq imaluunniit allangortinneqartoq, internetimut appakaaffissaqartitsinermik pisussaaffilikkamut ilaasoq, takuuk § 23, j, piffissami aalajangersimasumi suleqatit akornanni avammulluunniit nioqqutigineqassanngitsaq.

Akimut ersittuutitsinissamut pisussaaffik

§ 23 l. Akimut ersittumik ingerlatsinissamut pisussaaffeqarneq paasineqassaaq neqerooruteqartartut annerpaamik tigummisuusut paasissutissanik aalajangersimasunik tamanut saqqummiussaqaqtartussaanerattut.

Imm. 2. Neqerooruteqartartoq annerpaamik tigummisuusoq assigiinngitsinnginnissamik pisussaaffigiligaasimappat, takuuk § 23 k, Atuisartoqarnermut Unammilleqatigiinnermullu Aqutsisoqarfiup neqerooruteqartartoq peqqusinnavaa neqeroorummik nalinginnaasumik taaneqartumik tamanut saqqummiinissamik, naammaginnartumik qilertaanngitsumik attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut allat ingerlatsivinnik internetimut appakaaffissaqartitsinermut kissaatigineqartumut pisariaqanngitsunik akiliisariaqannginnissaannik qularnaarnissaanut, tamanullu saqqummiussami nalunaarsorneqarsimassallutik kiffartuussissutit ataasiakkaat, taakkununnгалu tunngatillugu atugassarititaasut piumasaqaatillu, tamatumani aamma akigititat.

Imm. 3. Neqerooruteqartartoq annerpaamik tigumminnittoq pisussaaffilerneqarsimappat § 23 j, imm. 1, nr. 1-imi pineqartutut, atuisut atassutaannit qilertaanngitsut atorlugit internetimut appakaaffissaqartitsilerluni, tamanna pillugu neqeroorut nalinginnaasoq kikkunnut tamanut saqqummiunneqassaaq.

Imm. 4. Neqerooruteqartartut annerpaamik tigummisaqartut neqeroorutiminnik nalinginnaasunik tamanut saqqummiussisarnissamik pisussaaffiligaasut imm. 2-mi aamma 3-mi nalunaarneqartutut, kingusinnerpaamik tamanut saqqummiussinermut atatillugu neqeroorut nalinginnaasoq Atuisartoqarnermut Unammilleqatigiinnermullu Aqutsisoqarfimmut nassiutissavaa.

Imm. 5. Neqeroorut nalinginnaasoq minnerpaamik pissutsinut niuerfimmi aalajangiinnerni taaneqartunik imaqaassaaq, tak. § 23 i.

Naatsorsuutini immikkoortitsisarnissamut pisussaaffik

§ 23 m. Naatsorsuutitsigut immikkoortukkaartumik aaqqissuussinissamut pisussaaffeqarneq paasineqassaaq neqerooruteqartartut annerpaamik tigumminnittuusut internetimut

appakaaffissaqartitsinnermut tunngatillugu suliat aalajangersimasut immikkut naatsorsuusiornissai pisussaaffigigaat.

Imm. 2. Nipangiussisussaaitaanermik malittarisassat, pisortani sulianik ingerlatsisarnermut inatsit aamma inummut tunngasunik paasissutissanut inatsit unioqqutinnagit Atuisartoqarnermut Unammilleqatigiinnermullu Aqutsisoqarfik naatsorsuutitut tunngasunik paasissutissat, tamatumani aamma isertitat, tamanut takusassiarisinnaavai.

Akinik nakkutilliinnermut pisussaaffik

§ 23 n. Akinik nakkutillisussaananermik pisussaaffittut paasineqassaaq pisussaaffik neqerooruteqartartut annerpaamik tigumminnittuusut akinik aalajangersaasarnissamut piumasaqaatinik naammassinnittassasut, § 23 i, imm. 1 naapertorlugu niuerfimmut tunngatillugu aalajangigaaq tunngavigalugu.

Imm. 2. Pisussaaffik imm. 1-imi eqqaaneqartutut ittoq atortussanngortinneqarsinnaavoq niuerfiusunik misissuinerup ersersippagu neqerooruteqartartoq unammillernerup amigarneranik pissuteqartumik annerpaamik tigummisuusup akigititani piviusorsiunngitsumik qaffasissusillit atortiinnarsinnaagai, imaluunniit atuisartunut akornusiisumik akigititanik "qerititsisimaguni".

Imm. 3. Piumasaqaatinik aqqissuussisarnerni imm. 1 naapertorlugu, neqerooruteqartartup pisussaaffeqartup aningaasaliissutai isiginiarneqassapput, naammaginarumillu aningaasaliissutaanik erniortitsisoqarnissaa akuersaarneqassalluni, aningaasaliinnermi nalorninaatit ilaasut isiginiarlugit.

Imm. 4. Pisussaaffiliinnermi imm. 1-imi eqqaaneqartutut ittuni qularnaarneqassaaq, aningaasartuutit matussusernissaannut isiginiagassat periaatsilluunniit akit aalajangersarnissaannut atorneqarsinnaasut naammassisaqarluarnissamik siunnerfeqassasut, aamma attanneqarsinnaasumik unammillertoqarnissaanik pilersitsissasut, atuisunullu amerlanerusunik iluaqutissarsitsissasut.

Imm. 5. Elektroniskiusumik attaveqatigiissutit ataatsikkut aqqutitut kiffartuussinernut arlaqarnerusunut atorneqarpata, immikkoortukkaartumik isigalugit tamarmik ataasiakkaarlutik elektroniskiusumik attaveqatigiissutitut aningaasartuutaasunik taakkualuunniit ilaannik matussusiisussasut, taava Atuisartoqarnermut Unammilleqatigiinnermullu Aqutsisoqarfup nioqqutit internetimut appakaaffissaqartitsissutaasut akissaannik aalajangiisarnerni, arlariinnit atorneqaraangata aningaasartuutaasut naapertuuttumik agguarneqartarnissaat isumagisassavaa, atorneqarneranut attuumassuteqartuni, nioqqutitik internetimut appakaaffissaqartitsissutaasunik neqerooruteqartartut akornanni.

Imm. 6. Neqerooruteqartartoq annerpaamik tigummisuusoq pisussaaffiligaappat akinik nakkutilliinissamut, takuuk imm. 1, neqerooruteqartartoq tamatumunnga atatillugu pisussaaffilernerneqarsinnaavoq aningaasartuutaasunik naatsorsuusiortarnermik atuinissaanik, akinik nakkutiginninnermut tapertatut. Tamatumunngalu atatillugu piumasaqaateqartoqarsinnaavoq neqerooruteqartartup aningaasartuutissanut naatsorsuusiortarneq atorneqartoq allaaserissagaa, tassanilu minnerpaatut aningaasartuutitik immikkoortut pingaarnerit arlariit aningaasartuutitut katersuiffiusut ersersinneqassasut, aamma aningaasartuutit agguarneqarneranni malittarisassat tunngaviusut, kikkunnit tamanit atorneqarsinnaalersillugit.

Imm. 7. Neqerooruteqartartoq annerpaamik tigummisuusoq neqerooruteqartartumut atasuunngitsumik pingajuusumik nakkutilliisitsissaaq aningaasartuutaasunut naatsorsuusiata imm. 6 naapertorlugu suliarineqarsimasut, pisussaaffiliussaasimasut naapertorlugit suliaasut, taakkualu naapertuunnerat pillugu

oqaaseqaateqassalluni. Atuisartoqarnermut Unammilleqatigiinnermullu Aqutsisoqarfiup naapertuuttuunerinut uppersaasat ukiumoortumik tamanut takusassiarisassavai.

Imm. 8. Atuisartoqarnermut Unammilleqatigiinnermullu Aqutsisoqarfiup niuerfimmi aalajangiinnermi tak. § 23 i ersarinnerusunik maleruagassiussavai akinik nakkutilliinnermi aaqqissuussinerit periaaserineqartussat qanoq ittut atorneqassasut.

Aaqqissuussamik immikkoortitseqqanissamut pisussaaffik

§ 23 o. Aaqqissuussamik immikkoortitsinertut paasineqassaaq neqerooruteqartartoq annerpaamik tigummisuuusq nioqqutissiornermilu imaluunniit agguassissarfinni assigiinngitsut iluanni isumaginnittuuusq, niuerfusumi nioqqutit internetimut appakaaffissaqartitsissutaasut tulluartut amerlasuukkuutaarlugit tuniniarnerannut atatillugu ingerlatsivimmut arlaannaannulluunniit attuumassuteqanngitsumut isumagissannngortissagaa.

Imm. 2. Atuisartoqarnermut Unammilleqatigiinnermullu Aqutsisoqarfik taamaallaat immikkut ittutigut neqerooruteqartartut annerpaamik tigumminnittuusunut suliat immikkoortisimaneqarnissaannik pisussaaffiliisnaavoq, imaappat:

1) Atuisartoqarnermut Unammilleqatigiinnermullu Aqutsisoqarfiup nalilersuinnermut atatillugu, takuuk § 23, g, paasippagu nioqqutit internetimut appakaaffissaqartitsissutaasut tulluartut amerlasuukkuutaarlugit tuniniarnerannut atatillugu pingaaruteqartunik ataavartunillu unammilleqatigiinnermi ajornartorsiuteqartoq imaluunniit niuerfimmi ajutoortoqartoq, aamma

2) Atuisartoqarnermut Unammilleqatigiinnermullu Aqutsisoqarfiup nalilerpagu pisussaaffiit § 23 i, imm. 2, nr. 1-5 naapertorlugit tunniunneqarsimasut unammilleqatigiinnermik naammaginnartumik pilersitsisimangitsut.

Imm. 3. Ingerlatsinerit immikkoortisimaneqarnissaannut pisussaaffik makkuninnga imaqarsinnaavoq:

1) Immikkoortortoqarfinnik naleqquttunik ingerlatsivittut namminersortunngortillugit immikkoortitsineq.

2) Ingerlatsiviup ingerlataanik aamma nioqqutaanik imaluunniit kiffartuussinerinik ingerlatsivimmit tassannga isumagineqartussanik immikkoortitsineq.

3) Tigussaasumik sulisunik aamma pisortanik sulisut pisortallu sinneriniit immikkoortitsineq.

4) Ingerlatap iluani nakkutilliissutinik aaqqissuussanik pilersitsineq, ingerlatseqatigiiffiup immikkoortitsisumik ingerlatsinnginnissaanut anguniagaasunik isumaginnittussanik.

5) Aaqqissuussaanikkut iliuusissanik pilersitsineq, ingerlatsivimmi immikkoortitami sulisuusut pituttorsimannnginnissaannik qularnaarisussamik, aaqqissuussaanerlu kajuuummisitsisussaq tassunga tulluarsagaq.

6) Pisussaaffiit naammassineqarnissaannut qularnaarisussanik illup iluani atugassamik ilitersuusiorneq.

7) Ingerlatsinerit akimut ersittuunissaannik qularnaarisumik illup iluani atugassamik ilitersuusiorneq, minnerunngitsumik soqutiginnitsinut allanut atatillugu.

Nakkutilliineq il.il.

§ 23 p. Atuisartoqarnermut Unammilleqatigiinnermullu Aqutsisoqarfik nakkutilliisuvoq malittarisassat kapitalimi uani pineqartut eqqortinneqarnissaannut, aamma malittarisassat kapitali una naapertorlugu suliaasut eqqortinneqartarnissaannut.

Internetimut appakaaffissaqartitsinissamik noqqaassutit naleqquttut aamma peqatigiilluni ataatsimut

atuisitsisinnaatitsineq

§ 23 q. Atuisartoqarnermut Unammilleqatigiinnermullu Aqutsisoqarfik aalajangiisinnaavoq pisumi aalajangersimasumi naleqquttumik internetimut appakaaffissaqartitsinissamik imaluunniit peqatigiilluni ataatsimut atuisitsisinnaatitsinissamik imaluunniit atuuttup allanngortinnissaanut noqqaasoqarnersoq pillugu, § 23 a, imm. 2 imaluunniit § 23 i naapertorlugu.

Imm. 2. Qinnuteqaat attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartumit tunniunneqarsimassaaq, § 23 b, imm. 2-mi pineqartuni piumasaqarsinnaasumit imaluunniit ilaasumit.

Imm. 3. Atuisartoqarnermut Unammilleqatigiinnermullu Aqutsisoqarfiup imm. 1 tunngavigalugu aalajangiineri sapinngisamik sukkanerpaamik pisassapput, sapinngisamillu kingusinnerpaamik qaammatit sisamat qaangiunneranni, attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartup suliassamik Atuisartoqarnermut Unammilleqatigiinnermullu Aqutsisoqarfimmut suliassanngortitsineraniit, imaluunniit suliap allatigut akerleriissutaasunik suliaqartarnermut imm. 4 naapertorlugu suliassanngortinneqarneraniit.

Imm. 4. Atuisartoqarnermut Unammilleqatigiinnermullu Aqutsisoqarfik imm. 1 naapertorlugu aalajangiinissamut taarsiullugu aalajangersinnaavoq internetimut appakaaffissaqartitsinissamik aamma peqatigiilluni ataatsimut atuisitsisinnaatitsinissamik isumaqatigiissuteqarnissamut imaluunniit allannguinnissamut naleqquttumik noqqaassuteqarnersoq pillugit pisuni aalajangersimasuni suliap, allatigut akerleriissutaasut sularineqartarnerinut malittarisassat naapertorlugit suliassanngortinneqassasoq, nalilerneqarpat akerleriissutaasup aaqqiissutissarsinissaanut tamanna naleqqunnerusoq. Naalakkersuisut akerleriissutaasut sularineqartarneri pillugit ersarinnerisunik malittarisassiusapput.

Imm. 5. Suliami imm. 1-mi ilaasumi imm. 4-lu naapertorlugu akerleriissutaasut sularineqartarnerannut malittarisassat naapertorlugit suliassanngortinneqarsimasumi attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut ilaat ataatsip peqataasup noqqaassutigippagu Atuisartoqarnermut Unammilleqatigiinnermullu Aqutsisoqarfiup imm. 1 naapertorlugu suliaq aalajangiiffigissavaa.

Aalajangiigallarnerit il.il.

§ 23 r. Atuisartoqarnermut Unammilleqatigiinnermullu Aqutsisoqarfik kapitali una imaluunniit malittarisassiat taanna naapertorlugu suliamik ingerlatsinermini paasissutissanik atortussanilluunniit piumasarisimasaminik tigusinngikkuni, takuuk § 30, taava paasissutissat pigineqartut tunngavigalugit aalajangiisinnaavoq.

Imm. 2. Atuisartoqarnermut Unammilleqatigiinnermullu Aqutsisoqarfik suliamik attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut akornanni internetimut appakaaffissaqartitsinissaq aamma peqatigiilluni ataatsimut atuisitsisinnaatitsinissaq pillugu ingerlatsinerminut atatillugu suliami akuusut susassaqtartut arlaanniit qinnuteqartoqarnera tunngavigalugu aalajangiiffigissinnaavaa:

- 1) internetimut appakaaffissaqartitsinissaq imaluunniit peqatigiilluni ataatsimut atuisitsisinnaatitsinissaq aallartinneqarallassasoq, ingerlanneqaannassasoq imaluunniit aallarteqqinneqassasoq, kiisalu
- 2) atugassarititaagallartussanik aamma akiusussanik aalajangiilluni.

Imm. 3. Atuisartoqarnermut Unammilleqatigiinnermullu Aqutsisoqarfiup imm. 2 naapertorlugu aalajangiigallarnek allanngortissinnaavaa.

Imm. 4. Inaarutaasumik isumaqatigiissutaasussamik isumaqatigiissuteqartoqarpat, aalajangiigallarneq atorunnaassaaq, isumaqatigiissutip atortuulerfianiit.

Imm. 5. Inaarutaasumik aalangiisoqarpat, akiusut imm. 2 aamma 3 naapertorlugit aalajangerneqarsimasut iluarsiiigineqassapput, taamaasilluni attaveqaqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut ima atugassaqartinneqalissallutik inaarutaasumik aalajangiineq aalajangiigallarnerup atortuulerneraniit atortinneqalissalluni. Akiusunik kingumoortumik iluarsiiisuteqarnermi erniatigut annaasat annikinngitsut ilanngullugit isiginiarneqarsinnaapput.

Imm. 6. Attaveqaqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartoq uppersaattissanik naammattunik saqqummiisimangippat, taamaattumillu aalajangiinerugallartumik aalajangiisoqartariaqarsimappat, takuuk imm. 2, imaluunniit pissutsit atuuttut tunngavigalugit aalajangiisoqarsimappat, takuuk, imm. 1, imm. 5 apeqqutaatinngu akiusunik kingumoortumik aaqqiisuteqartoqassaaq, kingumoortumik aaqqiisuteqarneq suliaqartuni pingajuusumut iluaqutissaappat”.

2. § 30-mi imm. 3-nngorlugu ikkunneqassaaq:

” *Imm. 3.* Imm. 1-mi paasissutissat taaneqartut Atuisartoqarnermut Unammilleqatigiinnermullu Aqutsisoqarfiup Sverigemi, Norgemi, Islandimi, Finlandimi, Savalimmiuni Danmarkimilu unammilleqatigiinnermik oqartussanut ikiuinnermini atornissai aamma piumasarineqarsinnaapput, oqartussat taakku namminneq nunaminni unammilleqatigiinneq pillugu malittarisassanik atuinissaat siunertaralugu.”

3. § 31-mi imm. 3-ip kingorna nutaatut ikkunneqassaaq:

” *Imm. 4.* Atuisartoqarnermut Unammilleqatigiinnermullu Aqutsisoqarfik Sverigemi, Norgemi, Islandimi, Finlandimi, Savalimmiuni Danmarkimilu unammilleqatigiinnermik oqartussanut ikiuiniarluni nakkutilliilluni misissuisinnaavoq, oqartussat taakku namminneq nunaminni unammilleqatigiinneq pillugu malittarisassanik atuinissaannut tunngatillugu. Taamatuttaaq § 32-mi malittarisassat atortinneqassapput.”
Imm. 4 imm. 5-inngortinneqassaaq.

4. § 33 ima oqaasertalerneqassaaq:

” Politiit Atuisartoqarnermut Unammilleqatigiinnermullu Aqutsisoqarfik § 31, imm. 1-3 aamma § 32, imm. 1-4-mi pisinnaatitsissutit naapertorlugit suliaqarnerani ikiortassavaat.”

5. § 35, imm. 1 ima oqaasertalerneqassaaq:

” Unammilleqatigiinnermut Aalajangiisartut aamma Atuisartoqarnermut Unammilleqatigiinnermullu Aqutsisoqarfiup Inatsisartut inatsisaat naapertorlugu aalajangigaat allaffissornikkut oqartussanut allanut ingerlateqqinneqarsinnaanngillat.”

6. § 38 ima oqaasertalerneqassaaq:

” Piaarinaatsoorluni imaluunniit mianersuaalliorujussuarluni ukuninnga unioqqutitsisoq akiliisitaasinneqarsinnaavoq:

1) § 6, imm. 1-imik unioqqutitsisoq,

2) piumasamik § 8, imm. 3, imm. 3-at naapertorlugu nalunaarutigineqartumik unioqqutitsisoq imaluunniit naalanngitsoq,

3) § 11, im. 1-imik unioqqutitsisoq,

4) § 12, imm. 1 naapertorlugu peqqussummik unioqqutitsisoq imaluunniit naalanngitsoq,

5) § 13, imm. 1 naapertorlugu inerteqqummik eqqortitsinngitsoq,

- 6) § 17, imm. 1 naapertorlugu kattunermik nalunaarutiginninngitsoq,
- 7) § 19, imm. 2 naapertorlugu kattunnissamut inerteqqusineq eqqortinnagu kattunermik piviusunngortitsisoq, § 19, imm. 5, imm. 1-at naapertorlugu kattunnissap akuerineqannginnerani piviusunngortinnissaanut inerteqqummik unioqqutitsisoq, § 19, imm. 6, imaluunniit § 21, imm. 1 imaluunniit imm. 3 naapertorlugu piumasamik imaluunniit peqqusummik naalanngitsoq, imaluunniit § 23 naapertorlugu peqqusummik naalanngitsoq,
- 8) § 23 c-mik unioqqutitsisoq,
- 9) § 23 i, imm. 2, nr. 2 aamma 3-mi allassimasutut pisussaaffimmik § 23 i, imm. 1 naapertorlugu aalajangerneqarsimasoq naapertorlugu neqerooruteqartartumut pisussaaffiliunneqarsimasumik malinninngitsoq,
- 10) § 28 naapertorlugu peqqusummik unioqqutitsisoq imaluunniit naalanngitsoq,
- 11) neriorsummik § 29, imm. 1 naapertorlugu unioqqutinneqassanngitsumik unioqqutitsisoq imaluunniit naalanngitsoq,
- 12) § 29, imm. 2 naapertorlugu peqqusummik unioqqutitsisoq imaluunniit naalanngitsoq,
- 13) § 30 naapertorlugu piumasaqaammik naalanngitsoq, imaluunniit
- 14) Unammilleqatigiinnermut ataatsimiititaliamut imaluunniit Atuisartoqarnermut Unammilleqatigiinnermullu Aqutsisoqarfimmut paasissutissanik eqqunngitsunik imaluunniit tammartitsisunik tunniussaartoq imaluunniit suliamut paasissutissarsiorfigisamut paasissutissat pingaartut nipangiunneqarpata.
- Imm. 2. Imm. 1, nr. 1, isumaqatigiissuteqarnermiit, suliffeqarfiit kattunnerisa imaluunniit sulisaatsit ataatsimut aaqqissuunnerisa akuerineqarneranniit § 8, imm. 1, imaluunniit imm. 4 naapertorlugu Unammilleqatigiinnermut ataatsimiititaliamut nalunaarutigineqarneranniit Unammilleqatigiinnermullu ataatsimiititaliap § 8, imm. 1, imaluunniit imm. 4 naapertorlugu aalajangiinissaata tungaanut atortinneqassanngilaq.*
- Imm. 3. Inatsisartut inatsisaat manna naapertorlugu najoqqutassiani Kalaallit Nunaanni pinerluttulerinermut inatsit naapertorlugu akiliisitsisoqarsinnaavoq.*
- Imm. 4. Inatsisartut inatsisaat imaluunniit Inatsisartut inatsisaat naapertorlugu najoqqutassiani akiliisitsinissamik tunngavissaqartitsippat akiliisitsineq Kalaallit Nunaanni pinerluttulerinermut inatsimmi malittarisassat naapertorlugit inatsisitigut inuttut naatsorsuussamut akiligassanngortinneqarsinnaavoq.*
- Imm. 5. Imm. 1 aamma imm. 3-4 naapertorlugit akiliisitsinerit Landskarsimut nakkartinneqassapput.*
- Imm. 6. Kalaallit Nunaanni pinerluttulerinermut inatsit naapertorlugu pineqaatissiisoqarsinnaavoq § 6, imm. 1-imut akerliusumik unammilleqatigiinneq millisillugu niuernikkut isumaqatigiissuteqartoqarpat, unioqqutitsineq siunertaqartumik pisimappat ingasallunilu, ingammik unioqqutitsinerup annertussusia imaluunniit ajoqusiinerit kingunerisinnaasai peqqutigalugit. Imm. 1 naapertorlugu unammilleqatigiinneq millisillugu niuernikkut isumaqatigiissuteqarneq paasineqassaaq isumaqatigiissut, sulisaatsit ataatsimut aaqqissuunneri imaluunniit suliffeqarfiit akornanni kaaviiartaqarfimmi assigiinni makku pillugit akuersineq:*
- 1) akit, ilunaarutit assigisaalluunniit nioqqutit kiffartuussissutilluunniit tunineqarnerannit imaluunniit tuneqqinneqarnerannit pisut,
 - 2) nioqqutissiornerup tunisaqarnerulluunniit killilersorneri,
 - 3) niuerfnnik atuisunilluunniit immikkoortiterineq, imaluunniit
 - 4) neqeroorutininik ataqatigiissaarineq.

Imm. 7. § 6, imm. 1-imut akerliusumik pissutsit immikkut sakkortunerusut atorlugit unammilleqatigiinneq millisillugu niuernikkut immikkut ingasaassaamik isumaqatigiissuteqartoq Kalaallit Nunaanni pinerluttulerinermut inatsit naapertorlugu pineqaatissinneqarsinnaavoq. Pissutsinut immikkut sakkortunerusunut ingammik ilaatinneqarpoq unioqqutitsineq annertooq imaluunniit annertuumik ajoqusiinermik kinguneqartitsisinnaasoq.”

Imm. 8. Suliffeqarfinnut pineqaatissiissutitut akiliisitsissutit annertussusilernerini uku aallaavigineqassapput:

- 1) aningaasaqarnikkut iluanaarutit anguneqarsimasut imaluunniit anguniarneqartut, taakku naatsorsorneqarsinnaappata,
- 2) unioqqutitsinerup annertussusaa,
- 3) unioqqutitsinerup sivilissusaa aamma
- 4) suliffeqarfiup kaaviiartitai.”

§ 2

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaat nr. 17, 20. november 2006-imeersumi imaattunik allannguuteqartitsisoqassaaq:

1. § 6 atorunnaarsinneqarpoq.
2. § 11, *imm. 2, nr. 5 aamma 6* atorunnaarsinneqarput.
Nr. 7-9 taamaasillutik tassaalissapput nr. 5-7.
3. § 15 atortunnaarsinneqarpoq.

§ 3

Inatsisartut inatsisaat atortuulissaaq 30. december 2017.

Namminersorlutik Oqartussat, ulloq 17. november 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut